

# IKIM akan serah hasil penyelidikan hukum hudud kepada Johor

IKIM 3 JUL 2002

KUALA LUMPUR 2 Julai — Institut Kefahaman Islam Malaysia (IKIM) akan menyerahkan hasil penyelidikan mengenai undang-undang jenayah hudud kepada Kerajaan Negeri Johor tidak lama lagi.

Ketua Pengarahnya, Datuk Dr. Abdul Monir Yacob hari ini berkata, pihaknya memulakan penyelidikan mengenai undang-undang hudud sejak empat tahun lalu.

Beliau berkata, pihaknya kini telah merangka draf awal dan akan dikemaskinikan sebelum diserahkan kepada Kerajaan Johor yang menaja penyelidikan tersebut.

“Kami telah melantik jawatankuasa yang membuat penyelidikan ke negara-negara Islam lain seperti Qatar, Yemen, Sudan, Kuwait dan Mesir.

“Untuk melaksanakannya, kita kena kaji dahulu bukannya tengok kitab dan terus jadi undang-undang,” katanya pada sidang akhbar mengenai program baru di institut itu sepanjang tahun ini di Pejabat IKIM di sini.

Menurut Abdul Monir, hasil penyelidikan itu antara lain menjelaskan mengenai perundangan Islam di negara-negara yang dinyatakan.

“Kita akan fikirkan bagaimanakah pendekatan yang patut diambil oleh pihak berkuasa tentang undang-undang itu,” katanya.

Tentang program yang bakal dijalankan, katanya, IKIM akan menganjurkan tiga program utama sepanjang tahun ini antaranya Seminar Memahami Malaysia Sebagai Sebuah Negara Islam yang akan diadakan pada 17 dan 18 September depan.

Turut diadakan ialah Multaqa Sultan Ahmad Shah pada 14 dan 15 Oktober serta seminar antarabangsa tentang dinar emas pada 22 dan 23 Oktober ini.

Seminar Memahami Malaysia Sebagai Sebuah Negara Islam adalah anjuran bersama IKIM dan Kerajaan Negeri Selangor. Ia akan dirasmikan oleh Perdana Menteri, Datuk Seri Dr. Mahathir Mohamad

“Kami harap seminar itu dapat memperjelaskan kekeliruan yang timbul di kalangan rakyat negara ini,” katanya.

Multaqa Sultan Ahmad Shah pula adalah satu majlis ilmu yang akan mengundang Prof. Dr. Khalid Mas'ud dari Belanda yang akan membentangkan ucapnama berjudul *The Ruled and The Ruler in An Islamic State*.

Sementara seminar antarabangsa berjudul Gold Dinar in Multilateral Trades diadakan untuk meningkatkan kefahaman tentang konsep dinar emas.

Ia juga bertujuan menjelaskan peranan kerajaan dan bank pusat dalam mengawal selia sistem itu dan mengenal pasti negara-negara yang berpotensi untuk Malaysia mengadakan perdagangan dengan menggunakan dinar emas pada masa akan datang.

Perdana Menteri juga akan merasmikan seminar yang pada awalnya dirancang diadakan pada 25 Jun lalu.